

## Ontmoeting 10

# Braai op die Strand

Teks: Johannes 21:1-18

Hulpmiddels:

- Benodighede vir vuurmaak en roosterkoeke/stokbrode braai
- Laken wat as visnet kan dien
- Flits of kers om vuur voor te stel
- Rooi klei, rooi papier, skêre en skryfbehoeftes

**Die les help ons om te sien dat Jesus ons baie liefhet en dat ons Jesus ook baie liefhet.**



### WELKOM

Begin met stokbrood/roosterkoek braai. *Sorg dat iemand voor die tyd vir jou roosterkoeke maak of indien jy kan, maak dit self op die kole.* Wanneer kinders aankom gee julle die roosterkoeke uit of maak saam stokbrood en eet lekker saam. Terwyl julle eet, vra aan elkeen om die volgende sin te voltooi: “Liefde is wanneer: \_\_\_\_\_” “Jy is welkom om die liedjie: “Weet jy dat Jesus jou liefhet?” van Nedine Blom (Supercool 1) in die agtergrond te speel.

Indien daar genoeg tyd is, kan julle die liedjie “God is liefde” saamsing.



### WYDING

**Stilword-ritueel**

**Temalied: “Ek hef my hande op” van Luidkidz.**

Gebod: Die leidster bid die volgende sinnetjie: “Here, help ons om te verstaan wat werklike liefde is en help ons besef dat ons U ook liefhet.”



### WOORD

Dit was darem nou lekker om die roosterkoek/stokbrode te maak en te eet. ‘n Tydjie na Jesus se opstanding het Hy aan sy dissipels verskyn en ook ‘n vuurtjie gemaak vir broodjies en vis. Dit was Jesus se manier om vir die dissipels te wys dat Hy vir hulle lief is. Dit was egter vir Hom belangrik om te hoor of die dissipels ook vir Hom liefhet, spesifiek Simon Petrus

wat tydens Jesus se kruisiging gemaak het of hy Hom nie ken nie.

Kom ons help mekaar om die storie beter te verstaan deur dit op te voer. *(Jy nodig ‘n laken wat as “net” kan dien, ‘n kers of flitslig wat as ‘n “vuur” kan dien en ‘n klein roostertjie. As julle by die lokaal roosterkoeke gebraai het, kan julle selfs die regte vuur gebruik.)*

Die karakters wat jy nodig, is Jesus en 11 van sy dissipels. In hierdie verhaal is die karakter van Simon Petrus baie prominent. As dit ‘n ouer kind kan wees, sal dit goed wees. Die karakters luister mooi na die storie en voer die bewegings uit wat die storie vra.

Lees Johannes 21:1-18:

**1** Daarna het Jesus weer aan sy dissipels verskyn, by die See van Tiberias. Dit het só gebeur:

**2** Simon Petrus en Tomas, wat ook Didimus genoem is, Natanael van Kana in Galilea, die seuns van Sebedeus en nog twee ander dissipels was daar saam.

**3** Simon Petrus sê toe vir hulle: “Ek gaan visvang.”

“Ons gaan ook saam met jou,” sê hulle vir hom.

Hulle het gegaan en in die skuit geklim, maar daardie nag het hulle niks gevang nie.

**4** Toe dit al lig was, het Jesus daar op die strand gestaan, maar die dissipels het nie geweet dat dit Hy is nie.

**5** Jesus vra toe vir hulle: “Mense, het julle nie iets gevang om te eet nie?”

“Nee,” antwoord hulle Hom.

**6** Hy sê toe vir hulle: “Gooi die net aan die regterkant van die skuit uit, dan sal julle iets kry.”

Hulle het die net toe daar uitgegooi, en vanweë die groot klomp vis kon hulle hom nie weer intrek nie.

**7** Die dissipel vir wie Jesus baie lief was, sê toe vir Petrus: “Dit is die Here!”

Toe Simon Petrus hoor dat dit die Here is, het hy sy hemp aangetrek — want sy bolyf was kaal — en in die water gespring.

**8** Hulle was nie ver van die land af nie, net omtrent honderd tree. Die ander dissipels het met die skuitjie gekom en die net met die visse gesleep.

**9** Toe hulle aan land kom, sien hulle ‘n vuur brand en

'n stuk vis daarop lê. Daar was brood ook.

**10** Jesus sê toe vir hulle: "Bring van die vis wat julle nou net gevang het."

**11** Simon Petrus het toe in die skuit geklim en die net op die land getrek. Dit was vol groot visse, honderd drie en vyftig, en alhoewel daar so baie was, het die net nie geskeur nie.

**12** Toe sê Jesus vir hulle: "Kom eet."

Nie een van die dissipels het sover gekom om vir Hom te vra: "Wie is U?" nie. Hulle het geweet dat dit die Here is.

**13** Jesus kom toe, neem die brood en gee dit vir hulle, en net so ook die vis.

**14** Dit was al die derde keer dat Jesus aan sy dissipels verskyn het nadat Hy uit die dood opgewek is.

**15** Toe hulle klaar geëet het, vra Jesus vir Simon Petrus: "Simon, seun van Johannes, het jy My baie lief, meer as hulle hier?"

"Ja, Here," antwoord hy Hom, "U weet dat ek U liefhet."

Hy sê toe vir hom: "Laat my lammers wei."

**16** Jesus vra hom weer 'n tweede keer: "Simon seun van Johannes, het jy My baie lief?"

"Ja, Here," antwoord hy Hom, "U weet dat ek U liefhet."

Hy sê toe vir hom: "Pas my skape op."

**17** Jesus vra hom die derde keer: "Simon, seun van Johannes, het jy My lief?"

Petrus het bedroef geword omdat Jesus hom die derde keer gevra het: "Het jy My lief?" en hy antwoord Hom: "Here, U weet alles. U weet dat ek U liefhet."

Hy sê toe vir hom: "Laat my skape wei."

**18** Dit verseker Ek jou: Toe jy jonger was, het jy self jou klere vasgemaak en gegaan waar jy wil; maar wanneer jy oud is, sal jy jou hande uitsteek, en iemand anders sal jou vasmaak en jou bring waar jy nie wil wees nie."

### **Kinders dink na oor die verhaal:**

- Ek wonder van watter deel van die storie het jy die meeste gehou.
- Ek wonder watter deel van die storie dink jy is die belangrikste.
- Ek wonder wie is jy in die storie.
- Ek wonder of daar 'n gedeelte van die storie is waarvan jy glad nie hou nie.



- Ek wonder as Jesus 'n liefdeskaartjie vir jou sou skryf, wat sou daarin staan.
- Ek wonder as jy vir Jesus 'n liefdeskaartjie sou maak, wat sou jy daarin skryf.
- Jy kan een van hierdie vragies kies en papier of klei neem en iets maak wat jou help om 'n antwoord te kry vir hierdie vraag.

**Eindig met die seëngroet.**